

Parlamentario Andin Bikker(PDR)

Construccion di molina di biento cerca di cas tin efecto riba salud di hende

ORANJESTAD – Despues di dos presentacion e Comision fiho den Parlamento, encarga cu companianan estatal a reuni riba e topico di Urirama, e posicion di Partido Democracia Real a keda ratifica, pues cu e construccion di molina di biento cerca di cas tin efecto riba salud di hende. Lider di PDR Andin Bikker a bisa cu e reunion tabata importante pa haya un miho bista riba e efectonan di e proyecto. Tur fraccion den Parlamento a asisti na e reunion. E informacionnan mas importante cu a bin dilanti den e reunion, ta cu e distancia di e molinanan ta e problema di mas grandi. E distancia di construccion di e molinanan ta bay afecta mas cu mil cas den un area di menos cu 2 kilometer, cu un straling di 3 kilometer.

REUNION

Den e reunion a documenta e ponencianan cu a keda

presenta dor di expertonan. Tambe habitantenan di diferente luga na Merca a bin Aruba pa splica nan experiencia negativo dor di cercania di e proyecto na nan cas. Esunnan cu a haci e presentacion a indica cu e efectonan ta mesun cos na tur caminda. E argumentonan presenta por conta facilmente pa Aruba, teniendo na cuenta e similaridad di e proyecto aki cu otro pais nan.

DECISION

Den e reunion e Comisio sie voor de Milieueffectrapportage (MER), a tuma e decision pa pidi un evaluacion e rapport die desaroyadonan actual, ta bay haya e documentonan cu a keda presenta na e comision fiho den Parlamento.

E documentonan aki a keda manda via di e-mail pa e Comision MER cu ta haciendo e evaluacion. Di e forma aki Parlamento

ta haya un opinion mas independiente.

E meta concreto ta pa tur fraccion den Parlamento haya informacion riba e preocupacionnan cu ta existi.

Dialuna ultimo tabata tin dos presentacion y no ta tur parlamentario a acudi. P'esey tabata prudente pa invita e oradornan pa den un manera formal haci trabou di pre-investigacion den e reunion.

TESTIMONIO

E experto acustico Sr. Robert Rand y tambe dos residente di Maine a duna nan testimonio di e efectonan negativo riba nan salud. E dos personanan aki mester a muda di nan cas pa salvaguardia nan bienestar. Loke a resalta den e reunion ta, cu e distancia ta e preocupacion principal den e proyecto aki.

E construccion di e proyecto aki ta mucho cerca di areanan

pobla. Den un rapport a muestra cu tin kehonan di insomnio y otro kehonan. E kehonan aki ta mas bien di personanan cu ta biba den un area di menos di 2 kilometer cerca di e

molinanan. Cu e datonan aki, Parlamento kier logra yega na un decision mucho mas concreto di loke ta tumando luga den e proyecto aki. □

Turbinanan di biento na Urirama

Posibel menasa pa salud y futuro financiero



Parke di biento, Vader Piet, Aruba

ORANJESTAD – Despues cu a anuncia na mei cu a scoge Urirama pa segundo parke molina, diferente bos a lanta den protesta bisando cu e area selecta ta demasiado cerca di comunidadhan residencial, creando asina 'ki, un menasa pa salud di e residentenan.

Tres lider conoci ariba nos isla, cu ta cabesando e grupo "Residente Afecta Urirama" Lisette Malmberg,

Junior Croes y Lydia de Ruyter ta residentenan cu ta biba den zona di e 2 kilometer, unda esaki ta bira un menasa pa salud di e ser humano. Den desaroyo di e protesta, Sr. Henk Hutting di e proyecto di molina, 'Vader Piet Beheer N.V.' y 'Windparken Aruba Real Estate N.V.' recientemente a declara

Continuacion Pagina A19


na varios ocasion den media, cu e ta ofrece pa paga \$1 milyon dollar cash na cualkier persona cu por presenta prueba cu zonidonan di turbinanan di biento tin efecto negativo riba e salud di hende.

Abogado di grupo "Residente Afecta Urirama," na su turno, a entrega un carta na Mr. Hutting diaranson mainta, bisando cu nan ta acepta su reto y ta pidi pa e confirma su intento pa cumpli pa diabierna, 26 di october 2012. Tambe nan a informa di antemano cu si e cumpli, 100% di e fondo lo wordo duna na obranan di caridad riba e isla. Asina 'ki tambe e grupo a haci un invitacion na tur cu ta biba den e area, como tambe na lidernan di gobierno na un simposio unda expertonan treci for di exterior a comparti nan conocimiento y nan experiencia ariba e tereno. Algo cu ta di beneficio, no solamente pa esunnan afecta, pero pa tur di nos.

TESTIMONIO REAL

Presente tabata, Art y Cheryl Lindgren, kendenan a comparti nan experiencia real. Art y Cheryl Lindgren, un pareha ya di edad, a spaar nan placa y inverti den un cas ariba e isla di Vinalhaven, cu ta ubica ariba islanan Fox, na Maine, Merca. E cas aki, a bira nan cas di vacacion y eventualmente mester a bira nan cas di retiro. Na 2009 nan a wordo bisa di un proyecto di Turbina di Biento, un proyecto sostenibel y cu lo ta bay ta algo bon e residentenan, pa e isla y cu tambe lo reduci nan recibo di coriente.

E proyecto aki a wordo construi 800 meter for di nan area di residencia. "Na momento cu e turbina di biento a wordo cendi pa prome biaha, e tabata un diferente storia," Cheryl a bisa. "El a trece masha hopi desordo, cu hopi presion cu bo por a sinti riba bo pecho. Dolor di cabes a bira algo regular, como tambe sentimentonan di mareo. Falta di soño tabata e problema primordial, pasobra constantemente bo ta wordo lanta door



Lisette Malmberg y Junior Croes

di e zonido," Cheryl a sigui bisa. Despues di a soporta esaki pa 15 luna, Art a haya un atake curason, cu tabata e momento unda e pareha a dicidi di bandona nan hogar cu nan a construi y decora na nan smaak pa asina nan biba e resto di nan añanan eyman y mester a muda bek pa Maine. Cheryl ta conta cu pa motibonan financiero nan bisiñanan ta den e mesun situacion te cu awe.

BALOR DI PROPIEDAD

Art a purba bende e cas, sin exito. "Nos a dicidi pa bende e cas, cual tabata sin exito pasobra niun hende no kier cumpra e cas. Aparte di un logro, pa mayoria hende un cas, ta nan accion di mas grandi. Si bo kier sigui construi bo futuro financiero, mayoria hende, ta nan cas nan lo pone como garantia na banco pa haya prestamo financiero pa asina por sigui construi nan futuro plannan. Den un situacion asina, bo cas practicamente no tin balor, y bo balor financiero a bira cero. Esaki kiemen cu bo futuro financiero tambe ta bay a costo di e turbinanan di biento. Bo ta sinti practicamente cu bo balor financiero a wordo horta pa un corporacion. Algo cu nan, ni niun hende a reconoce." Art a bisa. "Tin hopi huiswerk cu mester wordo haci, e manera di a yega pone e proyecto sin apropiadamente investiga su consecuencianan, tabata e resultado di nos experiencia, y mi ta spera cu esaki no lo bay ta e caso pa e bunita isla aki," Cheryl a añadi.

Art y Cheryl Lindgren a termina, bisando cu nan cuenta di coriente nunca a baha, pero el a mas bien bira dobel.

EXPERTO DI ZONIDO

Tambe Bon dia Aruba a papia cu Robert Rand di Maine, kende ta un

experto di mas cu 30 aña di experiencia, consehando ariba e tereno di zonido y 10 aña den diseña plantanan grandi di mega multi watt. Rand su rol en specifico ora di diseña plantanan ta pa percura pa nan no produci niun reaccion den comunidad. Rand ta splica cu den tur otro ekipo cu ta genera energia, tin opcion pa reduci nan zonido.

E unico cu no tin e opcion



Central Art y Cheryl Lindgren hunto cu residentenan di e area Noord

aki ta turbinanan di biento. "No tin niun manera pa blokia e zonido di e bletnan cu ta gara e aire. Esakinan mester ta habri pa gara e biento. Kiemen una bes cu nan ta instala y si hendenan tin problema cu nan, e unico solucion lo bay ta pa e residentenan bandona nan hogar of pa move e proyecto, cu

generalmente ta algo costoso. Kiemen e unico solucion ta cu e turbinanan di biento, mester ta ubica 2 kilometer leu di areanan residencial. Y esaki no ta nifica cu bo no lo bay tende nan, pero ta simplemente prueba cu e ser humano su salud ta afecta dentro di e zona di 2 kilometer", Rand a bisa. □